

ԴԻՄՈՒՄՆԱԳԻՐ

Չուիցերիոյ հայկական եւ գուիցերիական կազմակերպութիւններ.-

Նեօշաթէլ-Ժիւրայի Հայկական Համայնք

Հայ Տիկնանց Միութիւն - Ժընեւ, եւ

Չուիցերիա-Հայաստան Ընկերակցութիւն

կը դիմեն

Ն. Վ. Պարոն Ռոբերտ Զոչարյանին

Նախագահ Հայաստանի Հանրապետութեան

Ն. Վ. Պարոն Արթուր Բաղդասարյանին

Հայաստանի Հանրապետութեան Ազգային Խորհուրդի Նախագահ

Ն. Վ. Պարոն Վարդան Օսկանյանին

Հայաստանի Հանրապետութեան Արտաքին գործերու Նախարար

Նորին Վստմութիւնք,

20 Յունուար 2004 թուականին, Հայաստանի Բրիտանիոյ Դեսպանուհին, Տիկին Թորդա Աբբօթ-Ուաթը, Հայաստանի մէջ դիւանագիտական իր պաշտօնակալութեան առաջին տարեդարձին առթիւ տուած մամլոյ ասուլիսի մը ընթացքին, անդրադառնալով **1915ի դէպքերուն**, յայտարարած է թէ հակառակ այն իրողութեան որ Բրիտանական կառավարութիւնը ատենին դատապարտած էր ջարդերը որպէս խժժութիւն, **ապացոյցները բաւականին պարզորոշ չէին որպէսզի կարելի ըլլար դէպքերը ցեղասպանութիւն որակել ըստ Միացեալ Ազգերու Կազմակերպութեան 1948ի Ցեղասպանութեան համաձայնագրին** եւ թէ այս նիւթին վիճարկումը կը շարունակուի պատմաբաններու եւ իրաւագետներու միջեւ,

Նկատի ունենալով որ աշխարհի մէջ արդէն տասնըհինգ պետութիւններ եւ խորհրդարաններ, կարգ մը շրջանային խորհրդարաններ եւ տեղական վարչութիւններ ու միջազգային կարեւոր կազմակերպութիւններ ինչպէս՝ ՄԱԿի Խորականութեան Կանխարգիլման եւ Փոքրամասնութիւններու Պաշտպանութեան Ենթայանձնախումբը, Եւրոպական Խորհրդարանը եւ Եկեղեցիներու Տիեզերական Խորհուրդը պաշտօնապէս ու պարզորոշ կերպով ճանչցած են Հայկական Ցեղասպանութիւնը,

Նկատի ունենալով որ սա երկրորդ անգամն է - նմանօրինակ ժխտողական յայտարարութիւն մը ըրած էր Տիկին Ռիվքա Քոհէն, Հայաստանի մօտ Իսրայէլի դեսպանուհին, 2002 թուականին - որ օտար դիւանագետ մը կասկածի տակ կը դնէ Հայկական Ցեղասպանութեան իրականութիւնը,

Նկատի ունենալով որ Հայաստանի կառավարութիւնը, երկու անգամուն ալ, ոչ մէկ հակազդեցութիւն ցուցաբերեց կամ շատ մեղմ կերպով հակադարձեց երկու դիւանագետներու մեծապէս վիրաւորական յայտարարութիւններուն ընդդէմ Հայկական Ողջակեզի յիշատակին, որ ընդունուած իրողութիւն մըն է ըստ միջազգային նորմերու,

Նկատի ունենալով որ այսպիսի յայտարարություններ, հայկական պետության սահմաններում մեջ, երբ համապատասխան վերաբերմունքի չեն արժանանար, իրենց ուղղակի ազդեցությունը կ'ունենան Հայ Ժողովուրդի գերիշխանության վրայ, տկարացնելով Հայկական Սփիւռքի ջանքերը ի խնդիր՝ Հայկական Ցեղասպանության միջազգային ճանաչման,

Նկատի ունենալով որ Հայաստանի կառավարության լռութիւնն ու անտարբերութիւնը Հայ Ժողովուրդի եւ Հայաստանի պետության ուղղուած անընդունելի եւ վիրաւորական յարձակումներուն դիմաց, քաղաքական վնաս կը հասցնեն Հայաստանին եւ Սփիւռքին միատեղ, վտանգելով անոնց մղած պայքարը ի պաշտպանութիւն՝ Հայկական Ցեղասպանության գործադրութեամբ ոտնակոխուած Հայ Ժողովուրդի իրաւունքներուն,

Նկատի ունենալով որ Հայաստանի Պետության ձեռնպահ կեցուածքը կ'ականահարէ Հայաստանի Հանրապետության բարոյական դիրքը Ղարաբաղի ժողովուրդի իրաւունքներու պահպանութեան իր ջանքերուն մէջ ընդդէմ Ատրայեճանի, մինչ Հայերու ջարդերը Սումկայիթի (1988), Կիրովպատի (1989), եւ Պաքուի (1990) մէջ կը կորսնցնեն իրենց նշանակութիւնը որովհետեւ ըստ արժանւոյն չեն փաստագրուած ու դատապարտուած, եւ պատասխանատուները ցարդ անպատիժ կը մնան, եւ

Նկատի ունենալով որ նմանօրինակ յայտարարութիւններ, անպատիժ մնալու պարագային, կրնան ամրապնդել թրջական կառավարութեան առկայ ժխտողական քաղաքականութիւնը՝ Հայկական Ցեղասպանութեան նկատմամբ ինչպէս՝ անցեալ տարուայ Թուրքիոյ ազգային կրթութեան նախարարութեան կողմէ նախակրթարաններու եւ երկրորդական վարժարաններու աշակերտներուն պարտադրուած հերքումը՝ քսաներորդ դարու սկիզբը տեղի ունեցած Հայերու, Ատրիներու եւ պոստագի Յոյներու բնաջնջումին, բացայայտօրէն ոտնակոխելով շատ մը միջազգային համաձայնագրեր, գլխաւորաբար՝ Մարդու իրաւունքներու Համաշխարհային Յայտարարութեան 26րդ յօդուածը եւ Երեխաներու իրաւունքներու Միջազգային Համաձայնագրի 29րդ յօդուածը,

Վերոյիշեալ կազմակերպութիւնները կը պահաջեն որ.-

- **Հայաստանի խորհրդարանն ու կառավարութիւնը ձեռք առնեն հարկաւոր օրէնսդրական եւ դիւանագիտական միջոցները որպէսզի յետագային կանխարգիլուի ուրիշներու այսպիսի վիրաւորական յայտարարութիւններ ընելը՝ Հայ Ժողովուրդի յիշողութեան դէմ,**
- **Հայաստանի մօտ Բրիտանիոյ դեսպանուհի Տիկին Թորտա Աբբօթ-Ուաթ հրապարակաւ ներողութիւն խնդրէ իր յայտարարութեան համար ու պաշտօնապէս ետ առնէ իր խօսքը. իսկ եթէ մերժէ, դեսպանուհին անբաղձալի անձ յայտարարուի Հայաստանի Հանրապետութեան սահմաններուն մէջ :**

Գալուստ Զօրիկ

Նեօշաթէլ-Ժիւրայի Հայկական Համայնքի Նախագահ

Անահիտ Յակոբեան - Կոտէլ

Ժընեւի Հայ Տիկնանց Միութեան Նախագահուհի

Սարգիս Շահինեան

Չուիցերիա-Հայաստան Ընկերակցութեան համանախագահ